

आकाशवाणी

खास-खास खबरां:-

- प्रधानमंत्री नरेन्द्र मोदी त्रै देशें दे अपने दौरे दे अखीरले चरण तैहत जंदी संजा ओमान पुज्जी गेदे न।
- ग्रामीण विकास ते कृषि ते करसान कल्याण मैहकमे दे केन्द्रीय मंत्री शिवराज सिंह चौहान अज्ज लोकसभा च विकसित भारत- G RAM G बिल 2025 पर चर्चा दा परता देगंन।
- केन्द्रीय सूचना ते प्रसारण राज्यमंत्री एल- मुरुगन .होरे आखेया जे .OTT Content केन्द्रीय फिल्म प्रमाणन बोर्ड दे अधिकार खेत्तर थमां बाहर रौहग।
- दिल्ली च वायु प्रदूशन दी समस्या दा मुकाबला करने लेई अज्जै थमां पेट्रोल पम्पें पर वैद्य प्रदूशन नियंत्रण सर्टिफिकेट दस्से विजन पेट्रोल जां डीजल नैई थ्होग।
- भारत ते दक्खन-अफ्रीका बश्कार 5 टी-20 अंतराष्ट्री क्रिकेट मैचें दी श्रृंखला दा कल लखनऊ च खेडेया जाने आला चौथा मैच बड़ी मती धुंध पौने करी रह्द करी दिता गया।

<><><><><><>

PM- Muscat

प्रधानमंत्री नरेन्द्र मोदी होर त्रै देशें दे अपने दौरे दे अखीरले चरण तैहत जंदी संजा ओमान दे दंडु दिनें दे दौरे पर पुज्जी गे। जॉर्डन ते इथोपिया दी कामयाब जात्तरा परैन्त श्री मोदी ओमान गे न। मस्कट ब्हाई अड्डे पुज्जने पर ओमान दे उप-प्रधानमंत्री होरें मोदी हुंदा सुआगत कीता। मोदी हुंदी एह जात्तरा ओमान दे सुलतान हैथम बिन तारिक हुंदे साद्दे पर होआ करदी ऐ। भारत ते ओमान बश्कार अज्ज व्यापक आर्थिक सांझ-भ्याली आले मुक्त बपार समझौते पर दस्तख्त कीते जागंन। श्री मोदी ते ओमान दे सुलतान हुंदी मजूदगी च इस समझौते पर दस्तख्त- केन्द्री उद्योग ते बपार मंत्री पीयूष गोयल ते उंदे ओमान दे हमरुतबा कैस अल युसुफ हुंदे आसेया कीते जागंन। इस दौरे दौरान प्रधानमंत्री होर ओमान दे सुलतान हुंदे कन्नै मिलने दे इलावा होरनें बी केई बड्डे कारोबारियें कन्नै मलाटी करगंन।

<><><><><><>

G Ram G Bill

ग्रामीण विकास ते कृषि ते करसान कल्याण मंत्री शिवराज सिंह चौहान होर अज्ज लोकसभा च विकसित भारत- G Ram G Bill पर चर्चा दा परता देगंन। लोकसभा नै जंदी चिरे रातीं विकसित भारत- G Ram G Bill बिल पर चर्चा सबूरी करी लैती। एह बिल 20एं बरें पराने महात्मा गांधी राष्ट्री ग्रामीण रोजगार गारंटी एक्ट दी थाहर लैग। एह बिल 2047 तगर विकसित भारत दे नजरिये मूजब ग्रामीण विकास आला इक तगड़ा ढांचा स्थापत करने दे मकसद कन्नै आहन्नेआ गया ऐ। एहदे तैहत हर माली बरे च हर ग्रामीण परोआर गी 125एं दिनें दी ध्याड़ी दी गारंटी उपलब्ध होग।

<><><><><><>

OTT Content

केन्द्रीय सूचना ते प्रसारण राज्यमंत्री एल. मुरुगन होरे आखेया जे OTT Content केन्द्रीय फिल्म प्रमाणन बोर्ड दे अधिकार खेत्तर थमां बाहर रौहग। लोकसभा च इक सोआला दे लिखियै दिते गेदे परते च डाक्टर मुरुगन होरें आखेया जे OTT समग्री- सूचना प्राद्योगिकी नियम 2021 दे प्रावधानें दे तैहत विनियमित हुंदा ऐ। उनें आखेया जे आचार नीति संहिता दे तैहत OTT प्लेटफार्मे गी कनून आसेया प्रतिबंधित समग्री दस्सने थमां बचना होग ते दिशा-निर्देशें मुजब गै प्रसारण समग्री दा उम्र दी बिनाह उप्पर वर्गीकरण करना होग। उनें आखेया जे ए नियम प्रसारण समग्री कन्नै सरबंधित मानदंडे दी पालमा यकीनी बनाने ते सार्वजनिक शकैतां दूर करने दे ब्रंऊ स्तरें आले संस्थागत तंत्र हेठ औंदे न।

<><><><><><>

LS- Prasar Bharti

सूचना ते प्रसारण राज्यमंत्री एल. मुरुगन होरें आखेया जे प्रसार भारती नै सांस्कृतिक पुज्ज गी बढावा देने ते कार्यक्रमें दे माध्यम कन्नै आमदन पैदा करने दे कन्नो-कन्नो अपनी सार्वजनिक सेवा आहली जिम्मदारी गी पूरा करने आस्तै कंटेंट सिंडिकेशन नीति 2025 दा मसौदा तयार कीता ऐ।

लोकसभा च लिखित परते च डाक्टर मुरुगन होरें आखेया जे इसदे च प्रसार भारती दे OTT प्लेटफार्म पर उपलब्ध डिजिटल फसर्ट कंटेंट गी बी ध्यानै च रखेया गया ऐ। उ'नें आखेया जे सरकार दूरदर्शन ते आकाशवाणी च कम्मकाज ते दर्शकें तगर पुज्ज बनाने आस्तै लगातार उपा करा'रदी ऐ।

<><><><><><>

WHO Global Summit

नमीं दिल्ली च विश्व सेहत संगठन दे दुए वैश्विक पारम्परिक चिकित्सा सम्मेलन च 25 मुलखें दे सेहत मंत्री हिस्सा लै'रदे न। आयुष सचिव वैद्य राजेश कोटेचा होरें मीडिया कर्मियें गी एह जानकारी दिती। उ'नें दस्सेया जे प्रधानमंत्री नरेन्द्र मोदी सम्मेलन दे समापन सत्र च शामिल होगन। उनें दस्सेया जे भारत नै सहयोगी मुलखें गी रिवायती चिकित्सा क्षेत्र च क्षमता निर्माण- शिक्षा ते अनुसंधान दे कन्नै गै नियामक ढांचे बनाने च माहिर सहयोग दी पेशकश कीती ऐ। इस सम्मेलन च 16 मुलखें कन्नै दपक्खी बैठकां होआ'रदियां न ते तेजिया कन्नै इक समझौता ज्ञापन पर दस्तखत कीते जागन।

<><><><><><>

Delhi PUC Certificate

दिल्ली च बधदे प्रदूषण पर काबू पाने लेई कीते जा'रदे सख्त हीलें तैह्त्त अज्जै थमां पेट्रोल पम्पें पर इक वैध पाल्यूशन अंडर कंट्रोल सर्टिफिकेट दस्से बिजन पट्रोल जां डीजल नेई थ्होग। पेट्रोल पम्पें गी बी एह जिम्मेदारी दिती गेई ऐ जे ओह एह सर्टिफिकेट चैक करन ते एहदे नेई होने पर पेट्रोल जां डीजल गाहक गी नेई दित्ता जा। एह फैसला सरकार नै ब्हाउ दे मय्यार च सुधार आहनने दी मंशा कन्नै लैता ऐ। जारी निर्देश मूजब पेट्रोल पम्प कैमरें ते प्रणालिएं दे राएं एह जांच करडन जे गड्डी दा प्रदूषण सर्टिफिकेट जायज ऐ जां नेई। गड्डी चालकें गी बी सलाह दिती गेई ऐ जे ओह बिजन खुजें अपनी गड्डी दी प्रदूषण जांच कराइयै वैध प्रदूषण सर्टिफिकेट अपने कन्नै रक्खन तांजे उ'नेंगी कुसै असुविधा दा सामना नेई करना पवै।

<><><><><><>

Army Logistics Milestone

भारतीय सेना नै कश्मीर घाटी च खास सैन्य रेल दे राएं टैंक ते तोप पजाइयै इक बड़ी ते महत्वपूर्ण उपलब्धी हासिल कीती ऐ। आकाशवाणी जम्मू संवाददाता दी रिपोर्ट मूजब एह गैं बढधी गश्त रणनीतिक समर्थ ते मुख्य दे उत्तरी छोर तगर सेना दी पुज्ज गी होर बी पुख्ता करदी ऐ। भारतीय सेना नै 16 दिसम्बर 2025 गी घाटी च विशेष रेल दे राएं टैंक ते तोपां पजाइयै टकोहदी ते रणनीतिक तौर पर महत्वै आहली उपलब्धी हासिल कीती ऐ। एह जानकारी रक्षा- जन-सम्पर्क अधिकारी नै सोशल मीडिया दी इक पोस्ट राएं सांझी कीती।

<><><><><><>

India-Bangladesh

भारत नै बांग्लादेश दे उच्चायुक्त रियाज़ हामिदुल्लाह होरें गी तलब करियै बांग्लादेश च बिगड़दे सुरक्षा सरबन्धी माहौल ते ढाका च स्थित भारतीय उच्चायोग दे आले-दोआले बनी दी खतरनाक स्थिति पर डूंगी चिंता जाहिर कीती ऐ। विदेश मंत्रालय नै इक ब्यानै च आखेया ऐ जे बांग्लादेश च हाल दी किश घटनाएं बारे उत्थुआं दे चरमपंथी तत्वे आसेया फैलाई जा'रदी झूठी कहानी गी भारत पूरी चाली खारिज करदा ऐ। विदेश मंत्रालय नै इक ब्यानै च आखेया ऐ जे एह मंदे भागें आहला ऐ जे बांग्लादेश दी अंतरिम सरकार नै इसदी नां गै पूरी जांच कीती ते नां गै इनें घटनाएं गी लेइए भारत कन्नै सबूत सांझें कीते। भारत नै बांग्लादेश च शांति- स्थिरता ते आजाद- निरपक्व ते समावेशी चुनावें दे प्रति अपना समर्थन दोहराया।

<><><><><><>

Santosh Trophy Row

जम्मू-कश्मीर दे खेडु मंत्री सतीश शर्मा हुंदे आसेया भरोसा दोआए जाने दे बाद जम्मू-कश्मीर सरकारै- 79मीं संतोश ट्रॉफी राष्ट्रीय चैम्पियनशिप लेई जम्मू-कश्मीर दी फुटबॉल टीम चुनने दी प्रक्रिया दी जांच लेई इक कमेटी दा गठन कीता ऐ। एह कारवाई इस चैम्पियनशिप लेई जम्मू-कश्मीर दी टीम लेई खडारियें दी ताल करने च कथित तौरा पर गड़बड़ियें दे आरोपें दे चलदे कीती गई ऐ- जेहदे च ताल कमेटी पर जम्मू खित्ते दी अनदिक्खी करने दा आरोप लाया गया हा।

आकाशवाणी दे जम्मू संवाददाता नै जानकारी दिती ऐ जे युवा सेवाएं ते खेडें सरबन्धी मैहकमें दियें कमीशनर सैक्रेटरी यशा मुदगल हुंदे आसेया जारी सरकारी हुकमै मुजब कमेटी गी एह जिम्मेवारी सौंपी गई ऐ जे ताल प्रक्रिया दी तफसीली जांच करियै- अस्सल हकीकत सामने आहन्नन ते एहदे बारे अपनियां सिफारशां 7एं दिने दे अंदर-अंदर जमा करान।

<><><><><><>

Cricket

भारत ते दक्खन-अफ्रीका बश्कार 5 टी-20 अंतराष्ट्री क्रिकेट मैचें दी श्रृंखला दा कल लखनऊ च खेडेया जाने आला चौथा मैच बड़ी मती धुंध पौने करी रह करी दिता गया। 5 मैचें दी श्रृंखला च भारत फिलहाल 2-1 कन्नै अगो ऐ। इस श्रृंखला दा 5 ते अखीरला मैच कल अहमदाबाद च खेडेया जाग।

<><><><><><>

Weather

जम्मू-कश्मीर च बुधवारे तापमान च मता उतार-चढ़ाव दिक्खेया गया। मौसम विभाग नै 20 दिसम्बर रातीं थवां दिसम्बर 21 चिरे दपैहरी तगर कश्मीर दियें उच्चियें धारें पर हल्की थवां दरमेयाने दर्जे दी बर्फबारी ते खित्ते दी केई सारी थाहरें पर हल्की बरखा पौने दी पेशगोई कीती गई ऐ। आकाशवाणी जम्मू संवाददाता दी रिपोर्ट मुजब कश्मीर च सिफर थमां हेठ आहला तापमान बने दा ऐ। कश्मीर च बडुलै ते संजा धुंध बी पवा'रदी ऐ- जेदे करी लोकें गी आने-जाने पर परेशानी होआ'रदी ऐ। कश्मीर खित्ते च श्रीनगर शैहरै च घट्टो-घट्ट तापमान मनफी इक इशारिया 6 डिग्री सैलसियम दर्ज कीता गया ऐ। जम्मू खित्ते दे जम्मू च तापमान 9 डिग्री सैलसियम दर्ज कीता गया- जेड़ा जे मंगलवारें 8 इशारिया 4 डिग्री सैलसियस दर्ज कीता गया ऐ। बटोत च तापमान 7 इशारिया 6 डिग्री सैलसियम दर्ज कीता गया- जेड़ा इक दिन पैहले 7 इशारिया इक हा। कटरा च तापमान 11 इशारिया इक डिग्री सैलसियम दर्ज कीता गेय- जिसलै कि इक दिन पैहले एह तापमान 10 इशारिया 4 डिग्री हा। कठुआ च तापमान 8 इशारिया 2 डिग्री सैलसियम दर्ज कीता गया- जेड़ा जे पैहले 8 इशारिया 8 हा ते जम्मू हवाई अड्डे पर तापमान 9 इशारिया 4 डिग्री सैलसियस दर्ज कीता गया- जेड़ा पैहले 6 इशारिया 9 डिग्री सैलसियस दर्ज कीता गया हा।

<><><><><><>